

**ՂԱՍԱԲ-ՕՂԼԻ / Հայ ժողովրդական հեքիաթներ, Հատոր VIII / Գուգարք (Լոռի),
Լոռու բարբառ (խոսվածք)**

Էլել ա, չի էլել մի թըգավոր: Էդ թըգավորը շատ շեն ա էլել, մեմենձ ըմարաթնի ու շըլիդ շատ երգըրնի ա ունեցել. հըմա էն ա՝ որ խեղճը անորդի ա ըլում: Ալամ ըշխարքումը ինչ որ գիտուննի ու գրբացնի կան, ինչ որ ջինդար ու փալբացնի կան՝ չիմնու կուշտն էլ մարդ ա դըրկում, չիմնուն էլ բերիլ ա տալի, որ մի ճար անեն՝ իրան մի գավակ ըլի, հըմա բան չի դառնում:

Էս խաբարը մի շատ իմաստուն Դարվիշի անգաճն ա ընգնում. ինքը, դորթ ա, շըլիզ ըշխարքի մեկել ծերունն ա ըլում, հըմա չունքի իրանից ումուդ ա ունենում, վեր ա կենըմ ու ճամփա ընգնըմ: Է՛, գնըմ ա գնըմ, չքել մի տարին տեղ ա հասնըմ:

Թըգավորին իմաց են տալի, թե. «Մի Դարվիշ ա եկել, քու տեսությունն ա ուզում»:

Դարվիշը, հլե որ թըգավորի ըմարաթնին ա մտնում հա, շըլիզդան շշկլվում ա ու աչքերը մթնըմ են՝ Էն զարդ ու զըրդարանքիցն ու ալ ու ալվան պլպլոցիցը:

— Դա՛րվիշ բաբա, ա՛սա տենում ի՞նչ խընդիրք ունիս,— հարցնում ա թըգավորը:

— Թըգավորն ապրած կենա,— ասըմ ա,— ես իմացել եմ, որ քի որդի չի ըլում, եկել եմ, որ Էնթավուր մի գիր անեմ, որ տարին վրա ասծով քի մի դոչ տղա ըլի:

— Դա՛րվիշ բաբա,— ասավ,— ըշխարումս էլ գիտուն ու դարվիշ չմնաց, էլ ջինդար ու փալբաց չմնաց, մժա հըվաքեցի, հըմա մինն էլա բան չի բըջարեցին:

— Թըգա՛վորն ապրած կննա,— ասըմ ա,— թող ես գիր անեմ, ըժու թե որ մի տարեն վրա քի որդի չըլի, իմ գլուխը տու:

— Դե՛ լավ, ասավ թըգավորը,— որ ըթենց ա, գիր ա՛րա, ես գլուխ կտրիլը գիդեմ ոչ. թե որ խոսքդ դրուստ դուս եկավ, իմ խազընիցը քաշովդ մին ոսկի կտամ:

Բերեց իրան ճամփու խարջուղն էլ տվուց:

— Թըգավորն ապրած կենա,— Դարվիշն ասավ,— ես քիանե ոսկի չեմ ուզըմ, հըմա մուննաթ եմ անըմ, որ եփ բեխեն ըլի հա, թողուս կնքավորը ես ըլիմ:

Թըգավորը միտք արավ, միտք ու թե. «Դե լավ,— ասավ,— թող ըթենց ըլի»:

Դարվիշը գիրն արավ, ոնց որ կարգն էր, ամեն բանի թամբահն ասարավ ու գնաց իր ճամփեն:

Տարին թըմամեց, Դարվիշի խոսքը դրստվեց. թըգավորին մի լավ սիրուն տղա էլավ: Էլ ի՞նչ ասեմ, էն ուրախությունն արին, որ անասելի, անպատմելի: Հըմա թըգավորը իր խոստմունքը կըտարեց ոչ. բեխին կնքիլ տվուց. «Ո՛վ գիդի,— ասավ,— հմի Դարվիշը մեռած ա, թե սադ»:

Ըժու թամբահ արավ, որ բեխին մի դուռն ու կտուրը փագած օթախի մեջ պըհեն չքել

մենձանալը. չունքի վախեր, որ չըլի՝ թե դարվիշը գա ու տենու:

Ո՛վ տարով կմենձանա, էդ բեխեն օրով էր մենձանում: Ո՛վ օրով կմենձանա՝ նա սըհաթով էր մենձանում:

Մի վախտ էլ բիրդան Դարվիշի միտն ընկավ էդ բանը. «Արի՛,— ասավ,— գնամ տենում ո՞նց ա էլել»: Ու ճամփա ընգավ, եկավ հասավ էս թըգավորի ըմարաթնին: Արի՛ դու հմի դրանց տես,

որ ջլիզ չլուք էլալ, թե. «Ըսկի բեխա չի էլել, թե՛՝ գիրը տուտ դուրս եկավ ու փլան-փատան»:

Դարվիշը, դորթ ա, նրանց խոսքերին հըվատաց ոչ, հըմա ըսկի խոսաց էլ ոչ: Նրան նստացրին, որ հաց ուտի:

Դու ասծու բանը ընդի տես, որ թըգավորի տղի կրցարանը Դարվիշի նստած տեղի

դիմացքումն էր, ու հլե էդ սըհաթին նրա հըմամ էլ ին բաժին տարել, որ հաց ուտի: Թարսի

պես, Դարվիշի ահիցը տղի մերը ընհենց շշկլվել էր, որ բաժնի միջին մի ոսկոռ էր թողել,

չունքի ամեն հետ նրա բաժնի մսի ոսկոռնին ջոգում էր: Էս տղեն միսը որ կերավ հա, ոսկոռը

կրծեց, կրծեց, տեսավ ծամվում չի, ջիգրը եկավ, շալտեց, փանջարովը տվեց: Փանջարեն շրթիսկալեն ետ բաց էլավ, ու արևի շողքը տուն ընգավ: Թրգավորի տղեն հրսկացավ ոչ, թե էն ինչ բան ա, շատ ըրմացավ ու տեղիցը վիկացավ արևի շողքի հետ կոխ բռնեց, որ սաքի թե՛ տանիցը դուս անի:

Հըմա փանջարի թրխկոցի ձենը Դարվըշի անգաճն ընգավ. նա տեղիցը վիկացավ փանջարովը մտիկ տվուց, տեհավոր թրգավորի տղեն արևի շողքի հետ կոխ ա ունում. էն սրհաթնետ գլխի ընգավ, որ թրգավորը իրեն խափել ա:

Դարվըշի ջիգրը շատ եկավ, թրգավորի տղին մտիկ արավ ու մի գեշ անիծը ասավ:

— Ի՞նչ անեմ,— ասավ, ա՛յ տղա, բալքա դուս Դունյա-գյոզալի բալբալեքին գաս:

Էս ասավ ու փասափուսեն հրվաքեց գնաց:

Մըխելի վախտից եղը թրգավորի կնիգը գնաց իր տղին ակը տալու. տուն մտավ ի՞նչ տեհավ, որ տղեն արևի շողքի հետ էնգրգամ կռիվսն ա տվել, որ քափ-քրդնքըմը մտել ա:

— Էդ ի՞նչ ա քու հալը, բալա՛ ջան, ինչի ես ըթենց քրդնել:

— Բա էս ի՞նչ ա, որ տուն ա մտել, կարում չեմ դուս անեմ:

— Ա՛յ որդի, էդ ի՞նչ դուս անելու բան ա, որ ասըմ ես, էդ խում արևի շողքն ա:

Տղեն գլխի չի ընգավ: Ըժու մերը կենդ-կենդ պատմեց թե. «Ախրը, ա՛յ որդի, լիս-աշխար կա, երգինք կա, արև ու լուսնյակ կան, մարդիկ կան»,— ու ամեն բան հրսկացրուց:

Տղեն հլե ըստոնք իմացավ թե չէ, ասավ.— Դե՛, մերա՛ ջան, ինձ դուս տարեք, տենում ի՞նչ թավուր ա էդ աշխարքը:

Մերը չուգեց, որ տղի սիրտը կոտրի, համ էլ Դարվիշը գնացել պրծել էր, տանը պրհելու էլ ի՞նչ մըհանա կար, վիկալավ ու դուս բերուց:

Տղեն որ դուս չեկավ լիս աշխարք ու չորսի կռանը մտիկ տվո՛ւց, խելքի ծերը կուլ գնաց:

Մտիկ տվուց իր հոր ըմարաթնուն, քաղքի սիրուն-սիրուն տներին, դրաղների կանաչ դոշավոր դարդու դամիշ սարերին, մերենու շիմշատշիմշատ ծառերին, դրանց ստեղծող ասծուն ու ջրլիզ ըրմացավ ու քեփն եկավ:

Ասավ.— Ես ուզըմ եմ քաղքիցը դուս գնամ, մը քիչ ման գամ, որ դիա սիրտս բաց ըլի:

Էն սհաթն նեթ թրգավորը իր թալիմ տված հրեղեն ձին թամբիլ տվուց ու տղին նստացրուց, որ գնա ման գա:

Տղեն ձին նիըլավ, տասը գութնամեկը քշեց ու եդ եկավ. մին էլ քշեց ու էլի եդ եկավ. վրա իրերն էլ որ քշեց հա՛, մըքիչ ավել գնաց ու հետն ու հետը աղաք քշելով շատ հեռացավ ու էն գնալն էր՝ ինչ գնաց:

Դարվշի անեծքը քյար արավ:

Թրգավորն ու կնիգը էնդդամ ճամփա պրհեցին, որ աչքները ջուր կըտրեց. եկավ ոչ, եկավ ոչ: Ղոշուն դուս արին, սար ու ձոր, քոլ ու չոլ ման ածին՝ հըմա ի՞նչ խոսք ա, հրեղեն ձիու եղնուց ըսկի կհասնվե՛ր, թրգավորի տղի իզն ու թոզն էլ չի բևաց:

Հմի գանք թրգավորի տղի կուշտը:

Սա վրա իրեք հետն էլ որ ձին քշեց, շատ դիր եկավ, սիրտն ուզեց որ մըքիչ էլ աղաք գնա ու ըթենց գնալովգնալով ջրլիզ հեռացավ:

«Գնամ,— ասավ,— գլուխս բաղա տամ ու Դարվըշի ասած Դունյա-գյոզալին գղնում»:

Գնա՛ց, գնաց, էլ շատն ու քիչը աստոծ գիդի, չքել հասավ մի դորուղ տեղ, որ կանաչ խոտը մարդաբոյ կանգնած էր. ընդեղ ձիուցը վեր եկավ, որ համ մըքիչ դինջանան, համ էլ ձին ըրածի:

Օրը սաքի թե էն ա հա մթնածոռել էր: Բիրդան բիր, որդյան որ էր՝ մի մարդ թուլըմիշ էլավ թրգավորի տղի ըղաքին: Էդ մարդը ուսին դրած մի թոփուզավոր երկաթե չոմբախ ուներ, որ ծերը հարիր փութ կըլեր, կոթը՝ քառասուն: Թրգավորի տղի թուք ու մուքը սառավ:

— Բարի՛ ռիգուն, ա՛խպեր,— ասավ երկաթե չոմբախավորը,— ի՞նչ մարդ ես դու,— ասավ,— որ էս դոբուղը ըրածացնում ես:

— Է՛հ, ճամփորդ մարդ եմ, ի՞նչ անեմ, ախպե՛ր ջան, ձիս սոված էր, ասի՝ մըքիչ ըրածացնեմ ու գնամ ճամփես, ասծու խաթեր, բա՛շխի:

— Էդ շատ բարի,— ասավ,— հըմա ոնց որ տենում եմ՝ խամ մարդ ես, արի ինձ ասա քու ով ըլիլը, քու բանի անումը, յա էս ա մթնել ա, քշերըս ո՞րտեղ պտիս կենալ: Թըգավորի տղեն մըխելի շշկվելու արավ, ու ինքն էլ հարցըուց թե.- Բա դո՛ւն ո՞վ ես, ախպերացո՛ւ, հարցնիլն ամոթ չըլի:

— Ես էս հանդերի դորըղչին եմ,— ասավ,— ու ինձ էլ Ղասաբ-օղլի են ասում:

— Ես էլ են փլա՛ն թըգավորի որդին եմ,— ասավ,— ու Դունյա-գյոզալը իմ բութեն ա, ինչ ըլի ըլի՝ էս նրան գոնուլ պտեմ:

Ղասաբ-օղլին մատը կծեց, էն սհաթը գլխի ընգավ, որ սրան անըծել են ու մեղքը շատ եկավ: Նա լավ գիտեր, որ թըգավորի տղեն Դունյա-գյոզալին գոնողը չի ու գլուխն էլ մի օղբաթի կտա:

— Դե որ ըթենց ա,— ասավ,— արի ես ու դուն ախպերանանք, ու էս էլ հետդ կգամ, չքել որ քի քու մուրազին հասցնեմ:

— Շատ բարի,— ասավ թըգավորի տղեն, ու իրար ձեռը տվին, պռոշտի արին, ասծու ըղաքին ուխտ դրին, որ մշվանց իրանց մահը հալալ ախպեր ըլին:

Ըծու Ղասաբօղլին ասավ.— Ախպե՛ր ջան, էս մի Ջադուքյար պըռավի տեղ գիդեմ, արի՛ գնանք նրա կուշտը, թե,— ասավ,— նա՛ մեզ կասի Դունյա գյոզալի տեղը, թե չէ՝ ուրիշ ոչ ով չի գիդենալ:

Սրանք վիկացան ճամփա ընգան: Թըգավորի տղեն ձիով էր, Ղասաբօղլին ոտով, հըմա հենց եղին գնեք էն հարիր ու քառսուն փթանոց թոփուզն ուսին, որ թըգավորի տղի հրեղեն ձին եղնեն հասներ ոչ: Մախլասի՝ շատ գնացին, թե քիչ, էդ աստոծ գիդի, գնացին հասան Ջադուքյար պըռավի տունը, որ մի վերանա չոլում մենամենակ կենում էր:

— Բարի ռիգուն քի, նա՛նի,— ասին ու կաղնեցին:

Ջադուքյար պառավը ըռանց «աստծո բարին» ասելու, «Ի՞նչ մարդիկ եք,— ասավ,— որ էս կես քշերին եկել եք. էս տեղ չունիմ,— ասավ,— գնացե՛ք ձեր բանը»:

Էս սառը ջուղաբը որ իմացան հա, Ղասաբ-օղլին ուզեց, որ մի մըհանով իր հունարը շանց տա, ու թե.— Դե լավ,— ասավ,— նեղանալ մի, հրես գնում ենք, հըմա նանի՛, նանի՛, հրեղ ծնդանըդ վրա մի լու կա:

Էս ասավ ու մթամ թե ուզեց, որ թոփուզի ծերովը լուն շանց տա: Հլե որ թոփուզի ծերը դրեց պըռավիս ծնգան վրա, պառավը չքել կեսը գետնումը մեր մտավ. ըծու եղ հանեց ու դրբա դուռն ըդու էլավ: Պառավը տեհավ, որ չէ՛, հաքես սրանք հայդախայդա մարդիկ չեն, համ էլ վախեց, թե չլի՞ իրան սպանեն, մթամ թե սկի բանի խաբար չէր, վիկացավ ու սրանց թե. «Ա՛յ որդիք, բարով, հըզար բարի եք եկել. աղբաթիխերեր, էսչախին ո՞ւր եք գնում, էս մի քշերն ըստի կացեք, ըծու աստոծ ձեզ հետ»:

Նրանք մնացին:

— Նանի՛,— ասավ Ղասաբօղլին,— մենք քու կուշտն ենք եկել ու մի մուննաթ ունենք, հըմա կըտարիլ պըտես:

— Աչքիս վրա, բալա՛ ջան,— ասավ,— ա՛սա տենում եղ ի՞նչ բան ա:

— Դունյա-գյոզալի տեղը մեզ ասիլ պտես, նանի՛ ջան, չունքի էս իմ ախպոր բութեն ա. սրա խաթեր գլուխս բադա պտեմ տալ ու գգնալ:

— Է՛, է՛, էդ լաբուլ դժար բան ա, որդի՛, էլլըհե ջիլ վախտս էր էլել՝ կիմանեի, հըմա հմի կարալ չեմ:

— Էլ դեռ, դեռ չկա, նա՛նի, ոնցորիսա պտես իմանալ ու մեզ սրվորացնել:

Պառավը մըքիչ միտք արավ միտք, ու թե.— Դե՛ լավ,- ասավ,— քնեցեք չքել Բարի լիսը Բաց ըլի, ըռավողը կասեմ:

Ըռավողը որ վիկացան, երեսները լվացին, աղոթք արին պրծան, պառավն ասավ.— Հրես էս ճամփեն կբռնեք՝ կերթաք ք, կերթաք ք չքելը որ մի մենձ մերի ռաստ կգա. Էդ մերումը մի անվերիվերի տեղ մի մենձ ըմարաթ կա, Դունյա-գյոզալը Էդ ըմարաթի միջին ա, օխտը ուշաք ախպեր ունի, նրանք օխտը օթախ մին մնի վրա փագած՝ շրլիզ ծերի օթախումն են պըռում Դունյա-գյոզալին: Հմի աստոծ ձեզ հետ ու ձեր մեղքը ձեր շլինքը:

Պըռավին շնորհակալութիւն արին, ասծու անըմը տվին ու ճամփու ընգան:

Քա՛նի օր, քա՛նի շաքաթ, թե քանի ամիս ճամփա գնացին, Էդ աստոծ գիդի, չքելը մի ռիգու հասան պըռավի ասած մերու միջի Դունյա-գյոզալի ուշաք ախպորտանց ըմարաթնուն:

Ըմա՛րաթ եմ ասըմ, որ սաղ ըշխարքումը ինչդամ թըզավորնի կան, չիմնու ըմարաթնուցն էլ լավը: Տանը ոչով չկար, ուշաքնին ֆորսատեղն ին, Դունյագյոզալն էլ զաթի օխտը օթախի միջին փագած էր: Դռանը օխտը օջաղ կար վառած, ամեն օջաղի վրա մի մեձ ընգնավոր պղինձ դրած կսկարենքնու վրա: Էդ պղնձնու միջին էլ մնումը սաղ-սաղ գոմեշ, մնումը եզը, մնումը ոչխար ու ջուռաջուռա ֆորսի մսեր՝ խլթխլթալն եփում ին:

Ղասաք-օղլին ու իր ախպերը ըմարաթնու պատի տակին թագ կացան մըշվանց տենուն, թե ինչ ա ըլում:

Հենց որ լավ դըրանլուխն ընգավ հա, մին էլ էն տեհան՝ հրես օխտը ուշաք ախպերտինքն էլ եկան՝ սպանոտած ֆորսերը ուսներին. մընի շրլակին՝ սաղ պախրա, մընի շրլակին՝ վերու վարագ ու ջուռաջուռա ֆորսի մսեր: Շալակնին վերածին ու սոված գիլանու պես վրա էլան պղնձնուն: Հըմա էն սըհաթը ֆոտով իմացան, որ իսանի ոտ ա մտել իրանց ֆողը: Իրար հարցրին ու Էդ սուս կացան, չունքի ասին՝ ով սիրտ կանի իրանց օլքեն ոտ կոխի:

Խելի վախտից եղը Ղասաքօղլին ախպորը թողուց տեղն ու ինքը վիկացավ ուսուլով աղաք գնաց դըբա ուշաքնին: Թոփուզը դրաղին վեղորուց, ջիլիզդան մոդացավ, «Բարի ռիգուն» ասավ ու, ոնց որ ինքն էլ նրանց ախպերն ըլի, դամի տակիցը դըմալթին հանեց, խփեց մի պղնձի միջի սաղսաղ դրած կիսաեփ գոմշի մեջն ու դուս քաշեց դրուց ըղաքին, կցեց թլաշիլն ու անոշ անիլը:

Ուշաքնին ջրիզ ըրմացան նրա սրտոտութենիցը. իրար ըրեսի մտիկ ին անում ու գլխնին պտըտում: Մին ուզում ին, որ վրա ընգնեն թիքաթիքա անեն Ղասաքօղլուն, մին էլ մտքնումը ասում ին. «Թո՛ղ մըքիչ հեռանա, ըծու մենք գիդենք»:

Ղասաքօղլին որ տեհավ սրանք հացիցը եղ դառան ու իրան խեթրիւթն են անըմ հա՛, ասավ.— Ա՛յ ուշաք ախպերտինք, էս ոնց որ տենըմ եմ՝ ձեր ջիգըր ինձ վրա շատ ա գալի, դե որ ըթենց ա՝ փետս ինձ տվեք, էս գնամ:

Սրանք էն սըհաթին իրանց պուճուր չոլախ դն ախպորց հրամայեցին, որ փետն իրան տա:

Դեր ման եկավ ման՝ փետը գդավ ոչ: Ըծու Ղասաքօղլին մատով նշանց տվուց. դեր մոդացավ, ի՛նչ տեհավ, որ մի հըչամաթ երկաթե թոփուզ ա. չալիշ էկավ չալիշ՝ ու ըսկի կարաց ոչ թե մի թիքա էլ ա ժաժ տա: Ուշաքնին տեհան որ շատ ա չորչարվըմ՝ կենդկենդ վիկենալով, վիկենալով՝ չիմն էլ վրա ընգան Էդ թոփուզի վրա ու նորնոր կոթը գեղնիցը բըրցրացրին ու եղ վեզձեցին:

Ըծու ջանըմսա՛ն Ղասաքօղլի, տեղիցը ծուլ էլավ, վրա թռավ, թե.— Ինչ կա ըստի, տնաշե՛նի, որ ըթենց տանջվըմ եք,— ու որ մի ձեռով բըրցրացրուց ոչ, էս քու ուշաքնու թուքը սառավ:

Տեհան որ չէ, կասենաս սա ուրիշ ջուռա մարդ ա, թե բանը էն՝ տեղը հասցնեն, օխտին էլ կկտորի, փափկեցին ու թե.— Էսչախին ո՛ւր էս գնըմ, ա՛յ ախպեր, համեցեք էս քշեր մեր կշտին

դոնախ կաց, դոնախը ասծունն ա, էքուց դվորը որ կուգես, աստոծ քի հետ, հըլա մենք էլ կտանենք մեր սնուորը անցկըկացնենք:

— Ես հլե ձեր կուշտն եմ եկել,— Ղասաբօղլին ասավ,— ու մի մուննաթ ունեմ, մախսուզ պտեք կըտարիլ:

— Ի՞նչ մուննաթ ա,— ասին,— հրամանք արա՛ տենունք, թե մեր ձեռիցը գալու բան ա՝ աչքներուս վրա, խի՞ չենք կըտարիլ:

— Ես մի ախպեր ունիմ,— ասավ,— հրե ձեր ըմարաթի պատի տակին ա, կանչեցեք գա ըստի, ըծու կասեմ:

Դենին դրգեցին՝ թըգավորի տղեն եկավ, «Բարի ըիգուն» ասավ ու նստեց:

— Հրես իմ ախպերը, ուշաբ բարեկամնի՛,— ասավ, ձեր քիր՝ Դունյազյոզալը սրա բութեն ա, եկել ենք ձեր կուշտը, մուննաթ ենք անըմ, որ Դունյազյոզալին իմ ախպորը տաք, իրար հետ պսակենք, գնան հասնեն իրանց մուրազին:

Ուշաբնու ջիգրը շատ եկավ էդ հըմարձակ խոսքերի վրա, հըմա ի՞նչ կարեին ասիլ, ի՞նչ գոռ ունեինք Ղասաբօղլուցը ուռի նման դողում են:

Մի վախտ դես ու դեն գձեցին թե. «Մենք քիր չունենք», հըմա որ Ղասաբօղլին ասավ թե.

«Դունյազյոզալի անումն ու գովասանքը ալամ ըշխարին այգին ա», էն վախտն էլ թե. «Մարդի ենք տվել» ու փլանպիստան:

— Էլ դես, դեն չկա՛,— Ղասաբօղլին ասավ,— ես շատ լավ գիդեմ, որ Դունյազյոզալը էս սհաթին ձեր ըմարաթումն ա ու օխտը դուռը վրեն փագած ա, մի խոսքով՝ թե չեք տվել, ձեզ սաղ թողնուլ չեմ, էն ըմարաթնու դռներն էլ ջարդ ու փշուր կանեմ ու Դունյազյոզալին կտանեմ:

Ուշաբնու վրա սառը ջուր մաղվեց էս խոսքերի վրա: Ճարներուն կտրվեց, դաբուլ կացան ու ասին.— Դե թող ախպերդ էլ հաց ուտի, կքընենք, վի կկենանք ու էքուց ըռավող նշան կդնենք: Էքսի ըռավողը թըգավորի տղին տարան Դունյազյոզալի կուշտը, մին մնու շանց տվին ու եփ տեհան, որ աղջիկն էլ տղին հըվանեց, խոսք տվին, որ մի քանի օրից եղը պսակեն: Ըծու երկու նշանածին թողին իրար կշտի, իրանք՝ օխտը ուշաբն էլ: Ղասաբօղլին էլ, վիկացան գնացին ֆորսի: Հըմա օխտը օթախի դուռն էլ նրանց վրա դայիմ փագեցին: Երկու նշանածը մնացին մենակ ու կցեցին քաղցրը գրիցը, իրար հետ խաղսը տալը, մի խոսքով, գիդեք էլի՝ թե թագա նշանածին ինչ կանեն: Մին էլ թըգավորի տղի աչքովը մի մենձ ջըղացաքար ընգավ, որ օթախի մեջտեղը վերընգած էր:

Սա եդ դառավ Դունյազյոզալին հարցրուց, թե «Ախր էս էքա ջըղացաքարը էսթավուր օթախի միջին ի՞նչ ա շինըմ»:

— Ոչի՛նչ,— ասավ Դունյազյոզալը,— դե ով գիդի իմ ախպորտանց բանը. վիր են կալել բերել ըստեղ վեգձել:

Սաքի թե ուզեց շլով տա իր նշանածին, հըմա նա հըվատաց ոչ.

— Զե՛, ասավ,— էդ ուրիշ բան կըլի, դու ինձ խաբում ես, հալքաթ ինձ սիրում չես, որ դրուստը չես ասում,— ու էնդամ եղևաց, որ ասիլ տվուց: Դե ինչ կուզի ըլի՝ աղջիկ էր, Էլի՛, չուստ խաբվեց:

— Դե որ ըրենց ա, կասեմ,— ասավ,— հըմա էդ քարին ձեռը չի տաս: Էդ քարի տակին,— ասավ,— մի խորը ֆոր կա. էդ ֆորի միջին էլ մի օխտը գլխանի ուշաբի ջամսաթ կա՝ դիմա-դիմա կտորած: Հըմա,— ասավ,— չունքի դրա ֆոքին էն թավուր անհասնելի տեղ ա, որ ոչով չի կարում գդնի, որ սպանի. իրան կտորեցին իմ ախպերտինքն ու էդ ֆորի մեջը գձեցին, քարն էլ դրին, որ դուս չի գա: Ընդուր որ,— ասավ,— Ուշաբ-գամին էսթավուր բան ա, որ ֆոքին ուրիշ տեղ ա պըհում, ու չքելը ֆոքին սպանեն ոչ, իրան ինչդդամ կտորեն, էլ եդ կսղնա:

— Բա էդ ընչի՞ խաթեր են կտորել դրան քու ախպերտիքը,— թըգավորի տղեն ասավ:

— Ընդուր խաթեր,— ասավ Դունյա-գյոզալը,— որ դա ինձ վրա ջունտուն էր էլել, ուզեր փախցնի:

Թըգավորի տղի սիրտը համփերեց ոչ. սա էլ քարին դես բգտեց, դեն բգտեց: Դունյա-գյոզալը ինչդդամ հարան փրդան արավ, որ ձեռք չտա ու վերջը փոշմանի՝ չէլտվ, ո՞ւմ կասես:

Էնդդդամ արավ, որ քարը մի քիչ ծռեց, լիսը ֆորն ընգավ ու ընդեղից մի խուլ ձեն դուս էկավ, թե. «Աստո՛ծ սիրող, ծարավ եմ, ջուր հասցրեք»:

Թըգավորի տղի մեղքն էկավ, էն զգամ չըրչարվեց, որ քարը ֆորի բերնի ցր գձեց, սաքի թե ուզեց մի հանգով ջուր հասցնի: Մին էլ մի էնթավո՛ւր գոռգոռոց վերելավ ֆորիցը, որ հլեի ամբի գոռոց ըլեր: Օխտը գլխանի ուշաբը ֆորիցը սրդացավ դուս էկավ: Դուս էկավ, տարավ բերեց մի լավ թըթալոշ հասցրուց էս խեղճ թըգավորի տղի բերնին ու Դունյա-գյոզալին վիկալավ փախցրուց: Թըգավորի տղեն, ըսոր էս գնացել, թե էրգ, իրանից գնաց ու մեռածի պես ֆորի դրտոնիվեր փռվեց:

Մըքիչ վախտից եղը ուշաբնին ու Ղասաբ-օղլին ֆորսատեղիցը եղ էկան, տուն մտան՝ ի՛նչ տեհան, որ բանը բանիցը անց ա կացել: Ուշաբնին էն սհաթը գլխի ընգան, որ թըգավորի տղի արած բանն ա: Ղասաբ-օղլին էլ որ տեհավ իր ախպերը նդաված վերընգած ա հա, խելքը գլխիցն ընգավ ու կցեց վրեն սառը ջուր ածիլ, անգաճնուցը ձգձգիլ, բերանը փետի կտոր կոխիլ, քներակներուն հուփ տալ, չքելը որ եղ բերուց: Ուշաբնու ատամնին դրոնշնոտում ին, որ մի ձեռաց թիքա-թիքա անեն թըգավորի տղին, հըմա Ղասաբօղլու ահիցը ժած չին գալի: Եփ թըգավորի տղին հարց ու փորձ արին՝ ամեն բան իմացան, մնացին շվարած:

Ղասաբ-օղլին ասավ.— Ի՞նչ էք շշկլվում, ինձ քառասուն օր վաղա տվեք, էն ասծու անըմը կտամ ու ճամփու կընգնեմ. թե քառասուն օրումը ձեր քվերը բերի՝ խում շատ լավ, թե չբերի հա՝ հրեղ իմ ախպերը թող ձեր կշտին գրավ ըլի, ըծու ինչ ուզըմ էք արեք:

— Դե որ ըրենց ա,— ասին ուշաբնին,— արի՛ էն ուշաբի տեղն ասենք: Էդ ուշաբը,— ասին,— ինքն իր հըմար ջոգ երգիր ունի, հրեն է՛, փլան ըշխարքումը: Նրա երգրի չորսի կուռը ծովով պատած ա ու մեջը խոռը մերի ա, իրանից սավափի ոչով չի կարում ծովն անց կենա:

Ղասաբ-օղլին գնալուց աղաք իր ախպորը քըրքով քաշեց՝ հենց պահ տըվուց ուշաբնուն.— Տեհե՛ք,— ասավ,— չթել իմ գալը լավ պըհեցեք, չլիմչիմանամ, թե քաշիցը մըքիշ պակսել ա, վա՛յ ձեր մեղքը:

Ըծու ասծու անըմը տվուց, թոփուզը ուսին դրուց ու դու էլավ: Ղասաբօղլին գնա՛ց, գնա՛ց, հըմա ինքն էլ չէր գիդըմ, թե ո՞ւր ա գնում: Շատ էր գնացել, թե քիչ, էդ աստոծ գիդի, մի օր էլ գլուխը քաշ արած, մտքի տունն ընգած իր ճամփեն գնալիս մի դըլմաղալի ձեն ընգավ անգաճը: Գլուխը բըցրացրուց տեհավ, որ իրանից խելի հեռու, իրեք մարդ ճամփու մեջտեղը կոկում են:

Նրանք էլ որ սրան տեհան հա՛, մին մնու ասին.— Ա՛խպեր, հրե էն դարիբ մարդին բերեք դըտամեր կարգենք, ոնց ասի՝ չիմքս էլ դաբուլ կանենք:

Ղասաբօղլին մոդացավ տեհավ, որ դրանց կոիվը մի խալըչի, մի ճիպտի ու մի թաղքե գդակի վրա էր:

— Բարի՛ օր,— ասավ Ղասաբօղլին:

— Ասծո՛ւ բարին,— ասին էն իրեք մարդը:

— Էդ խի՞ էք կոկում,— ասավ:

— Ղարիբ ախպե՛ր,— ասին,— մենք էս իրեքս էլ հալալ ախպերտինք ենք. մեր հերը հարուստ մարդ էր, մեռնելիս իր կարողութիւնը ընենց վասյաթ արավ, որ նրա թողած փողը մի ախպորս ըլի, մնացած դովլաթը մեկել ախպորս ու էս խալըչեն, ճիպոտն ու քեչաքուլուզը վրա իրեք

ախպորս: Հմիկ մեր կոճիվը էս բաների վրա ա. էս ուզում եմ ըստոնք ինձ ըլին, փողն ու կարողութիւնը՝ նրանց: Նրանք էլ ուզում են, որ իրանց ըլի: Լմի՞ք ե մուննաթվըմ ենք, որ մեր վճիռը տաս:

— Ախր սրանք ի՞նչ բաներ են, որ կոճում եք,— ասավ ըրմացած Ղասաբ-օղլին:

— Սրանք է՛ն բաներն են,— ասին,— որ էս քեչա-քուլլուգը որ գլխիդ դնես ու խալխի միջին կաղնես, ոչով քի տենուլ չի, հըմա դուն չիմնուն էլ կտենուս: Էդ խալըչի վրա էլ որ նստես, աչքերդ խուփ անես ու էդ ճիպոտովը տաս, հլե ի՞նչտեղ որ ասես՝ ձեռաց կթոչի ու ընդի վե կգա:

Ղասաբօղլին մըքիչ միտք արավ, միտք ու թե.— Հլա տվեք տենում:

Ձեռներուցը առավ քեչա-քուլլուգը, դրուց գլխին, մըքիչ հեռացավ՝ տեհավ որ դրուստ իրան տենըմ չեն: Ըծու ձեռաց նստեց խալըչի վրա:

Աչքերը խուփ արավ, ճիպտով տվուց, ու թե.— Ա՛յ խալիչա,— ասավ,— է՛ փլան ծովի մեջտեղի ըշխարքումը, փլան ուշաբի ըմարաթի կողքին դուս գաս:

Խալըչեն թռավ: Մին էլ աչքը բաց արավ, որ մի անվերի-վերի տեղ մի մենձ ըմարաթի կշտի վեր ա եկել: Խալըչեն ու ճիպտը տարավ մի ծառի տակի պըհեց, քեչա-քուլլուգը դրուց ջեբն ու կամաց-կամաց գնաց ընդի, տուն մտավ, որ ուշաբը գլուխը Դունյա-գյոզալի ծնգան վրա դրած քնած ա: Դունյա-գյոզալը, որ Ղասաբ-օղլուն տեհավ հա՛, համ շատ ուրախացավ, համ շատ վախեց ու ձեռներով հըսկացրուց Ղասաբ-օղլուն, որ ուշաբի վիկենալու վախտն ա, թո՛ղ հեռանա: Չունքի Ուշափղամին օխտն օր իրար վրա քնում ա ու հմի հլե օխտն օրը թըմամել էր: Ղասաբ-օղլին քեչա-քուլլուգը դրուց գլխին ու մնաց տեղնուտեղը կաղնած, հըմա Դունյա-գյոզալը հենց իմացավ, թե դուս գնաց: Մըխելի վախտից եղը ուշաբը ճլնկոտաց, դես շուռ եկավ, դեն շուռ եկավ ու զարթնեց:

Հլե աչքերը բաց արավ թե չէ, Դունյա-գյոզալին ասավ.— Ըստեղ իսանի ոտն ա եկել, մըրթ մըրթաֆոտ ա գալի:

— Աղբաթիխե՛ր,— ասավ,— ո՞վ կարա քու երգիրը ոտը դնի, ո՞վ կարա էն ծովերը անց կենա, յա թե քու ահիցը ո՞վ սիրտ կանի մոդ գա, էդ ի՞նչ էս ասըմ:

Դրուստ ա, Դունյա-գյոզալի խոսքերը ուշաբին մըխելի դինջացրին, հըմա էլլըհե դուս գնաց, որ մի դես ու դեն աչքն ածի:

Ուշաբը դուս էլավ թե չէ, Ղասաբօղլին քեչա-քուլլուգը գլխիցը վի կալավ: Դունյա-գյոզալի սիրտը դոդ ընկավ, ըրմացավ, թե՛ էն ի՞նչ բան էր:

— Չուստ արա՛ դուս իլ,— ասավ,— որ հըես տուն կգա:

— Վախիլ մի՛, ինձ բան չի լիլ,— ասավ,— էս եկել եմ, որ քի փախցնեմ, հըմա ինչ որ ասեմ կըտարիլ պտես: Ուշաբը որ տուն գա,— ասավ,— հարցրու, իմացի, թե ո՞րդի ա ըլում նրա ֆոքին:

Էս ասավ ու ինքը դուս էլավ:

Ուշաբը տուն եկավ թե չէ, Դունյա-գյոզալը կցեց սուտ խունջիկ-մունջիկ անիլը, սուտ սեր շանց տալը, որ բալքամ ուշաբին խափի:

Ըծու, թե.— Ֆոքուդ տեղը ինձ շանց տա՛ս:

— Ի՞նչ էս անըմ,— ասավ,— ինչի՞դ ա պետքը:

— Ընդուր համար, որ դու ցերեկը սաղ օրը գնում էս ֆոքսի, էս տանը մենակ նստած մըլոթվում եմ, ըռանց քի սիրտս բաց չի ըլում, հլե ֆոքուդ տեղն էլ ա գիդենամ, որ հետը խաղամ, քու հավեսը հանեմ,— ասավ ու սուտ լաց եղավ: Ուշաբն էլ հենց գիդեր, թե դրուստ որ իրան սիրըմ ա Դունյա-գյոզալը:

— Հրե՛ղ,— ասավ,— իմ ֆոքին մեր դռան տակին ա,— ու ինքը դուս էլավ ֆորս գնաց: Նրա գնալուց եղը Ղասաբ-օղլին տուն մտավ, որ իմանա, թե բանն ի՞նչումն ա: Հլե որ իմացավ, թե ասել ա՝ ֆոքին դռան տակին ա, գլխի ընգավ, որ խափել ա:

— Բան չի կա,— ասավ,— դուն դասիդ դուլլուդ արա, դռան փակը գուքի, զըրթարի, մթամ թե հըվատացել ես, որ նրա ֆոքին ըտի ա:

Ուշաբը ըիգունը տուն եկավ տեհավ, որ դռան տակը ռանգոնգ ծաղկներով փնջած, ըղաքին սիրուն շորեր փռած ու ղըրթարած ա:

— Ի՛,— ասավ,— ախր կնիկարմատ ես, է՛, ձեռաց հվատացիր, բա դռան տակին ֆոքի կլի՞:

— Բա ո՞րդի ա, ինի՞ չես դրուստն ասըմ:

Թե.— Հրե դ մեր չալ սնի տակին ա իմ ֆոքին,— ասավ:

Էլեդ ինքը գնաց ֆորս: Ղասաբ-օղլին քեչա-քուլլուգը գլխին ընդի կաղնած էր: Տեհավ, որ հմի էլ խափեց ուշաբը: Հըմա Դունյա-գյոզալին ասավ.— Բան չի կա, ըսօր էլ եդ չալ սինը գուքի, տենանք վերջը ի՞նչ ա ըլում:

Ըիգունը ուշաբը տուն եկավ տեհավ, որ Դունյա-գյոզալը հմի էլ չալ սինն ա գուքել, զրթարել: Էլեդ գլուխը պըտըտեց, հըմա տեհավ, որ մթա թե էս ա՝ Դունյա-գյոզալը դրուստ իրան շատ ա սիրում, մտքումն ասավ. «Արի՛, հմի դրուստն ասեմ»:

— Իմ ֆոքին,— ասավ,— ո՛նչ սնի տակին ա, ո՛նչ էլ դռան, շատ հեռու տեղ ա: Հրե՛ փլան կռանը մի խոռը մերու միջի մի վանք կա, էն վանքի միջին մի դուլաբ կա, դուլաբի միջին մի դուրթի կա, դուրթու միջին էլ մի աղունիկ կա, էն աղունիկն ա իմ ֆոքին:

Ղասաբօղլին քեչա-քուլլուդը գլխին դրած՝ դռան կշտին կաղնած էր. հլե իմացավ թե չէ՝ դուս քսվեց ու զարբեց դրա ուշաբի ասած տեղը:

Աժդահա Ղասաբ-օղլին գնաց, հասավ վանքը, նի մտավ, դուլաբը բաց արավ: Դուրթին բաց արավ թե չէ, տանը ուշաբի սիրտը թոթոռցն ընգավ:

Էն սհաթը հըսկացավ, որ բանն ինչումն ա ու թե. «Հա՛, հա՛, քու տունը քանդվի, Դունյա-գյոզալ, ինչ իմ տունը քանդեցիր», ասավ ու տեղիցը ծուլ ըլիլն ու դրա վանքը դու ըլիլը մին արավ:

Ղասաբ-օղլին դեռ նոր էր դուրթին բաց արել, որ մին էլ մի էնթավուր գոգոռց, ֆշշոց ու ճոճոռց ընգավ վանքի մեջը, որ հենց իմացավ թե սար, ձոր, մերի ու քոլ պոկ են էկել ու գալիս են, թե իրան տակովն անեն: Դուրթին վեզձեց ու ֆոքին ձեռին բռնած՝ դուս գնաց վանքիցը, թե տենու էն ի՞նչ խաբար ա: Դուս էկավ ի՞նչ տեհավ, որ սաղ մերին թողը հե՛նց ա բռնել, որ կասես չանգ ու ծուխ ըլի խառը, ընենց որ աչքը բան չոնկեց: Դրուստ ա, Ղասաբ-օղլին վախլուկներիցը չէր, հմա հենց իմացավ, թե աշխարքը փուլ ա գալի: Հլե մին էլ էն տեհավ, որ խելի հեռու՝ ուշաբն ընաց: Հըմա ո՛նց ա գալի, ո՛նց ա գալի, որ տերը փրգի, ըզատի: Էն գոռուն-գոչունը նա ա վեր արել ու նրա շնչի բուղն ա ու նրա քամու թոզը, որ սաղ մերին կապել ա:

Ղասաբ-օղլին եդ որ տեհավ՝ ըսկի վախեց ոչ, հըմա ուշաբի ֆոքու ճիտը մըխելի ըլորեց:

Մըխելի որ ըլորեց հա՛, ուշաբի ծնգները մըքիչ թիւացան, երիշը կըմանցացրուց ու Ղասաբ-օղլուն ձեն տվուց.— Ա՛յ իսանօղլի,— ասավ,— ասծու սիրու խաթեր, սպանիլ մի՛, եդ աղունակին, չքելը մի գամ քի հասնեմ. վախիլ մի՛, խոսք եմ տալի, որ քի զարար չի տամ:

Սաքի թե ուզեր խափի:

— Լա՛վ, արի՛, սպանիլ չեմ,— ասավ:

Հըմա հլե ուշաբը մոդացավ թե չէ, Ղասաբ-օղլին ձեռաց աղունակի ճիտը պոկեց, աղունակի ճիտը պոկիլն ու ուշաբի հանգչիլը մին էլավ:

Ղասաբօղլին որ տեհավ ուշաբը էն ա ինչ էս ըշխարիցը պրծավ հա՛, շատ ուրախացավ ու եզին-եզին ըղու էլավ եդ՝ դրա Դունյա-գյոզալը, որ նրան էլ ուրախացնի:

Էլ ինչ ասիլ կուզի, որ Դունյա-գյոզալը դիա շատ ուրխացավ, որ գերութենից պրծավ ու չուստ իր նշանածի տեսին էլ արժանի կրլի: Ըծու Ղասաբ-օղլին նրան խըտատացրուց, որ չուստ սարքվի, ճամփու ընգնեն:

Դունյա-գյոզալը թե. — Էս մեր չալ սնի տակին մի բան կա, — ասավ, — գիդեմ ոչ ի՞նչ ա. չքելը քանդես ոչ իմանամ, թե ի՞նչ ա, էս գալ չեմ:

Ղասաբ-օղլին երկաթե թոփուզով մին հասցրուց թե չէ՝ չալ սինը տեղիցը թռավ, էն դրադին վեր ընգավ, ու մին էլ տեհան սնի տակիցը բարձր բոյով մի ջանաթաթախ կնիկարմաւո դուս էկավ, որ կասեիր աժդըհա ըլեր:

Սրանք ըրմացան ու մնացին պել կտրած. հարցրին, թե. — Ո՞վ էս, ի՞նչ իսան էս:

Ասավ. — Ինձ Արաբուզանգի են ասըմ:

Ըծու Ղասաբ-օղլին թե. — Իմ կնիկը կդառնա՞ս:

— Խի՞ չեմ դառնալ, — ասավ, — քիանից լավ մա՞րդ:

Ըծու իրար խոսք տվին, խոսք առան, որ մարդ ու կնիկ ըլին ու Դունյա-գյոզալին էլ տանեն իր նշանածին հասցնեն: Արաբուզանգին էլ Ղասաբօղլուցն էր դվաթով: Նրա երկաթե թոփուզը սա մի ձեռով բմբուլի պես էր բըցրացնում:

Ըծու իրեքն էլ էն խալըջի վրա նըստոտեցին, աչքները խուփ արին ու Ղասաբ-օղլին էն ճիպոտը տվուց ու ասավ. «Ա՛խալիչա, որդիանց որ ինձ բերել էս, էլեդ ընդի վիզաս»:

Մին էլ աչքներուն ընդի բաց էլավ, որ էն խալըջատեր իրեք ախպերն էլ դեռ ճամփըմը կազնած են: Ղասաբօղլին ըտի էլ դրանց քարսաղ արավ ու գնացին իրանց ճամփեն:

Շատ գնացին, թե քիչ, աստո՞ծ գիդի, գնացին հասան Դունյա-գյոզալի ախպորտանց ըմարաթը, հլե է՛ն օրը, ինչ որ Ղասաբ-օղլու ընդիանց հեռանալուց եդը քառասուն օր թըմամել էր:

Ղասաբ-օղլին Արաբուզանգուն ու Դունյա գյոզալին մըխելի հեռու թողուց, ու ինքը ոտնետոտը աղաք գնալով դոնիցը անգաճ դրուց:

Թարսի պես ուշաբնին էլ էն սհաթին իրար է՛ն ին ասըմ թե. «Բերեք ուտենք էդ թըզավորի տղին, ո՞վ գիդի դրա ախպերն ի՞նչ էլավ, վադեն էս ա ըսօր թըմամել ա ու դեռ ընում չի: Հմի ո՞վ գիդի յա կորավ, յա մեռավ. ի՞նչ նրա բանն էր է՛ն ուշաբի ձեռիցը աղջիկ խլիլը: Բերե՛ք ուտենք, — ասին, — մեր քվերը դա բադա տվուց»:

Հենց էս գրըցումն ին, որ Ղասաբօղլին բիրդան ընդիանց ո՛ր ասավ ոչ՝ «Ի՛նչ, ի՛նչ», էս քու ուշաբնու թուք ու մութը սառավ: Եդ ուզեցին իրանց գլուխը դրստեն ու թե. «Մենք հանաք անեինք» ու փլան-փստան:

Մախլա՛ս, Ղասաբօղլին ախպորը քչերքը դրուց քաշեց, տեհավ, որ հըլա մի փութ էլ ավելացել ա: Ըծու Դունյա-գյոզալին ու Արաբուզանգուն էլ կանչեցին, բարովեցին ու էդ քշերը մենձ ուրախութին արին:

Ըռավողը, բարի լիսը բաց ըլելու հետ, վիկացան ու կցեցին սարք ու կարգ անիլ, որ ճամփա, ընգնեն դրա Թըզավորի երգիրը: Ուշաբնին շատ մուննաթ արին, որ հլե մի շաբաթ էլա իրանց կշտին դոնաղ մնան, հըմա Ղասաբօղլին դաբուլ չարավ, ասավ. — Վախտով իմ ախպորը տանեմ թըզավորի կուշտը, որ իր որդու բախտավորութիւնը տենու, ուրխանա:

Խեղճ ուշաբնու իլլաշը որ կտրեց, բերին իրեք լավ յորդա ձի թամբեցին Դունյա-գյոզալի, թըզավորի տղի ու Արաբուզանգու հըմար: Ղասաբօղլուն ձի չէր պետքը: Նրա եղնուց առանց էն էլ ձի չէր հասնում. մին էլ էս, որ նրա թոփուզի տակին ձի՝ կղիմանէ՞ր: Խուլախսա ձիանունն նի ըլան, ասծու անումը տվին ու ճամփու ընգան:

Քա՛նի օրըմը, քա՛նի շաբթըմը, թե քա՛նի ամսըմը տեղ հասան, էդ աստո՞ծ գիդի, հըմա ճամփին ինչ որ անցկացավ՝ էս էն կասեմ:

Ղասաբ-օղլին ընենց եղին գներ, որ ձիանը եղնուց հասնեին ոչ: Հըմա վախեր, որ ձիավորնուն ահ պըտահի, էն ա մըքիչ տեղ որ հեռաներ հա՛, նստեր չքել ձիավորն ու իրան հասնիլըն ու եղ գու ըլեր: Մի հետ էլ ըթենց խելի հեռացել էր ու եփ մի ծառի տակի նստեց, որ գան հասնեն հա՛, նունջը տարավ:

Հլէ էդ վախտը իրեք սիրուն աղունիկ եկան ու էն ծառի վրա վեր էկան ու մին մընու ասին. —

Քի՛ քիր:

— Ի՞նչ ա քի՛ քիր:

— Գիտես ինչ կա՞:

— Ի՞նչ կա, — ասավ:

— Բա՛ ասիլ չես, որ թըգավորը իր տղի ու Դունյա-գյոզալի գալն իմացել ա, հըմա գիդի որ նրանց բերողը Ղասաբօղլին ա, մտքումը դրել ա, որ եփ գան քաղքին մոդանան հա՛, մի ըռախտած ու դեղած ձի դրկի Ղասաբօղլու աղաքը՝ մթա թե պատիվ տալու, որ ինչ ա՛ Ղասաբ օղլին որ վերըլի հա՛, դեղվի ու մեռնի: Ըծու իր տղին էլ ուզում ա սպանիլ տա, որ անման Դունյա-գյոզալին իր կնիկը շինի:

Էս ասին թե չէ, Ղասաբ-օղլու աչքը ընդի բաց էլավ, որ աղունիկնին թոչում են, հըմա նրանց ասածնին չիմ իմացավ: Մըխելի վախտից եղը ձիավորնին եկան հասան ու եղ վիկացավ ըգու էլավ, հըմա աղունիկնու մասին նրանց բան չի ասավ:

Էլ ծերքի դոնուշվան պես ձիավորնուցը որ եփեջա հեռացավ հա՛, էլեդ ծառի տակին նստեց, որ գան հասնուն:

Էլի որ քունը մըքիչ տանելու արավ, էլեդ էն իրեք աղունիկը եկան ծառի վրա վերեկան ու մին մընու ասին. — Քի՛ քիր:

— Ի՞նչ ա՛, քի՛ քիր:

— Գիդե՞ս ինչ կա:

— Ի՞նչ կա, — ասավ:

— Բա՛ ասիլ չես, թըգավորը իր տան շեմքի ըղաքին մի մենձ խորը ֆոր ա փորիլ տվել ու բերանը խալըչով ծածկել, որ Ղասաբ-օղլուն ծերքին մեձրի, թե ինչ ա նա ոտքը խալըչի վրա դնի թե չէ՝ ֆորն ընգնի մեռնի, ըծու իր տղին էլ սպանիլ տա ու Դունյա-գյոզալին ինքն ուզի: Էս ասին ու թռան: Ղասաբօղլին էլ ասենք նղղած էր, հմա նրանց ըսածնին մըծա իմացավ: Ձիավորնին որ եկան հասան հա՛, նա էլեդ ըռանցի բան ասելու աղաք ընգավ ու էլի որ շատ հեռացավ, մի ծառի տակի նստեց, որ գան հասնեն:

Ընդովվան պես հլէ աչքերը կիսախուփ էլան թե չէ, էլի էն իրեք աղունիկը եկան ծառին նստոտեցին ու ասին. — Քի՛ քիր:

— Ի՞նչ ա, քի՛ քիր:

— Գիդես ինչ կա՞:

— Ի՞նչ կա:

— Բա՛ ասիլ չես, որ սրանք եփ թըգավորի տուն մտնուն հա՛, հացի վախտը Ղասաբ-օղլու բաժինը թըգավորը դեղած պտի դրդիչ տալ, որ սա ուտի ու մեռնի, ըծու իրան տղին էլ սպանիլ պտի տալ, որ Դունյա-գյոզալին ինքն առնու:

Ասին ու թռան:

Ղասաբօղլին բիրադի իմացավ, իրան պարգեր: Ձիավորնին հասան ու իրար հետ ճամփու ընդան: Հլէ որ թըգավորի քաղքին խելի մոդացան հա՛, մին էլ տեհան, որ բուլմա դոշուն ա գալի իրանց աղաքը: Թըգավորը, մթա թե պատիվ դեյին, իր տղի ու հարսի աղաքն էր զըրգել: Ղոշունի հետ էլ մի լավ ըռախտած, ոսկումն ու էրծաթումը կորած սիրուն ձի քաշելով բերին ու

դրուստ Ղասաբ-օղլուն թըվագա արին, թե. «Թըգավորն իմացել ա, որ դու ոտով ես գալի՝ ես ձին դըրգել ա, որ նի ըլես»:

Ղասաբօղլին ըսկի ծպտուն չի հանեց, թոփուզը բըցրացրուց ու էս ըռախտած ձիու կողքին որ թխեց ո՛չ, ձին վերընգավ ստակեց:

Ըծու որ հասան թըգավորի ըմարաթնու դուռը հա՛, թըգավորը ինքը դուս էկավ բիրադնուն էլ բարովեց ու չիմնու ծերքին Ղասաբ-օղլուն մեծրեց: Սաքի թե՛ կըպկապութիւնով ուզեր նրան խափի:

Հըմա Ղասաբ-օղլին որ մըխելի աղաք գնաց ու տեհավ, որ շեմքի ըղաքին դրուստ որ խալըչա կա փռած, ինքը խալըչի վրովը լոք արած կաղնեց ու դեռ Դունյա-գյոզալին, թըգավորի տղին ու Արաբուզանդուն անց կացրուց, ըծու ինքը նրանց եղնուց տուն մտավ: Ֆորը հլե դու-դու կան չելեն մնաց: Մախլասի, էլ գլուխներդ ի՞նչ ցըվացնեմ, մը քիչ վախտից եղը սուփրեն գծեցին, հաց քաշեցին: Հլե որ բաժըննին բերին հա՛, Ղասաբ-օղլին կերավ ոչ, իր բաժինը վեկալավ ու ընդի մի պուճուր շուն կա՝ տվուց իրան, շունը կերավ թե չէ՝ ստակեց:

Թըգավորը խու սաղ-սաղ մեռավ, չունքի իրա սարքած հունարնին մծու չիմ բեհտին անցկացան: Հըմա մտքումը դրուց, որ ոնց որ ըլի Ղասաբ-օղլուն մի հանգով փոթոցի տա: Մի օր թըգավորը Ղասաբ-օղլուն ասում ա.— Կերթաս համ անմըհական ջուր կըբերես ինձ հըմար, համ անմըհական խնձոր:

— Լա՛վ, կերթամ,— ասում ա Ղասաբ-օղլին:

Ասծու անըմը տվուց ու դու էլավ: Գնալու վախտը մի գեղի դրաղի մի պառավ կնգա ռաստ էկավ, նրանից խմելու ջուր ուզեց:

Պառավը ջուրը տվուց ու հարցրուց, թե.— Ո՞ր ես գնում, ո՞րդի,— ասավ:

Նա էլ դրուստ ասավ: Պառավը էն սհաթը գլխի ընգավ, որ թըգավորը չալիշ ա գալի, թե էդ մարդին փոթոցի տա:

— Որդի՛ ջան,— ասավ էդ պռավը,— անմըհական ջրի ու խնձորի գընացողը ընդեղից եդ գալիս քար ա դառնում:

— Նանի՛, — ասավ,— ո՞նց ա ըլում, որ քար ա դառնում:

— Ընդեղ մի աղջիկ կա,— ասավ,— թլիսմն ունի՝ ընդով ա քար շինում. ո՞ր գնաս,— ասավ,— ջուրը վերունես, խնձորն էլ պոկես ու եդ դառնաս հա՛, էլ եդ չի մտիկ անես. թե որ եդ մտիկ տվիր՝ քար կդառնաս:

Ըտոնք ասավ ու անմըհական ջրի ու խնձորի տեղն էլ սալըղ տվուց:

Ղասաբ-Օղլին պըռավին շնորհակալութին արավ ու գնաց իր ճամփեն:

Շատ գնաց, թե քիչ, էդ աստոծ ա իմանում, ոնց որ էր՝ տեղ հասավ: Տեղ հասավ, անմըհական ջուրն ու խնձորիցը վիկալավ ու եդ դառավ:

Եդ գալիս պռավի ասած աղջիկը աղաքը կտրեց, թողուց ոչ, որ անմըհական ջուրն ու խնձորը տանի, ասավ.— Արի՛ կոխ ունենք, թե ես քի վեգձես հա՛, էդ ջուրն ու խնձորը քի հալալ ըլի:

Սրանք իրար կալան: Իգիթ Ղասաբ-օղլին իրեք հատ հե՛ գեղնի ճըկատովը տվուց, որ ամեն վեգձելով իրեք թիզ գեղնըմը թաղվեց էդ աղջիկը: Տեհավ, որ ըթենցով Ղասաբ-օղլու հախիցը կարաց ոչ գա, ասավ.— Տա՛ քար, թավը քունն ա, հմի տերը քի հետ:

Ղասաբ-օղլին ըղու էլավ թե չէ՝ աղջիկը թլիսմն արավ ու եղնուց էնդդամ ղլմադալ արավ, որ խեղճը յանդիշ էկավ, էդ մտիկ արավ: Եդ մտիկ տալն ու քար դառնալը մին էլավ:

Նրան ըտի թողունք քար դառած ու գանք Արաբուզանգու հալը հարցնենք: Խեղճը ճամփա պիեց, ճամփա՝ ու որ տեհավ էկավ ոչ հա՛, իլլաջը կտրեց՝ ինքն էլ նրա եղնուց գնաց: Գնալու վախտը նա էլ էն պըռավին ռաստ էկավ:

Պառավը հարցուց թե. — Ո՞ր ես գնում, բա՛լա ջան:

Թե բա. — Նա՛նի, — ասավ, — էս ճամփենին ո՞ր են տանում:

Պառավը մատը կծեց, հըսկացավ, թե բանն ինչումն ա ու թե. — Ո՛րդի ջան, — ասավ, մի քանի վախտ սրանից աղաք մի տղամարդ էլ ըթե քի նման էս ճամփեննի գնաց ու էլ եղ չի եկավ, հմա նա մախսուզ քար դառած կլի:

Արաբուզանգու սիրտը ժլունգ էլավ:

— Նա՛նի ջան, — ասավ, — բա քարացածին սըղացնելու հնարը չի կա:

— Խի՛ չի կա, — ասավ, — ո՛րդի ջան, թե որ քարացածի ջամսաթը իր բոյովը մին ըմանում դնեն ու միջին էնղըդամ լաց ըլին, որ ըրտասունքը գլխիցը հետ կաղնի, նա էլեղ կըսաղանա:

Արաբուզանգին պռավին շնորհակալութիւն արավ ու նրա շանց տված ճամփեն բռնեց, գնաց:

Գնաց, գնաց չքելը մի քար դառած օքմին ռաստ էկավ: Չորսի կռանը մտիկ արավ, տեհավ որ իր իգիթ նշանածի երկաթե թոփուզը կողքին վերընգած ա. ընդուց ճնանչեց, որ քարացածը Ղասաբ-օղլին ա:

Սիրտը լաբու էրվեց, լաբու դարդ արավ ու լաց էլավ, հըմա Ղասաբ-օղլին քար էր կտրել՝ իմաներ ոչ: Արաբուզանգին վիկալավ Ղասաբ-օղլու քարացած ջամսաթը մի ուսին դրուց, թոփուզն էլ մեկել ուսին ու տուն հասցրուց: Ըծու Ղասաբ-օղլու բոյովը մին մի խորը աման ճարեց ու նրա քարացած ջամսաթը մեջը դրուց: Արաբուզանգին, թըզավորի տղեն ու մին էլ Դունյա-գյոզալը ամանի բոլորիշուռը շարտովեցին ու կցեցին մեջը լաց ըլիլ: Լաց էլան ու լաց էլան, հա՛ լաց էլան ու լաց էլան, բերանին ըռանց մնանա դնելու:

Թըզավորը Ղասաբ-օղլու քար դառնալը որ իմացավ հա՛, դոշուն հըվաքեց, որ տղին սպանիլ տա ու իրա սըրտինը կըտարի՝ Դունյա-գյոզալին իր կնիկը շինի:

Էքսի օրը ըռավողեց էն վախտը, որ մի օր ու քշերում էնղըդար լաց ին էլել, որ Ղասաբօղլու ծնգներիցը հետ ըրտասունքը բըցրացել էր ու էնղար տեղը սըղացրել, մին էլ էն տեհան, որ թըզավորը դոշունը չքել տասը հըզար մարդ դուռը պատեց:

Ջանըմսա՛ն Արաբուզանգի, նրանց ասավ. «Դուք լաց էլեք» ու ինքը թոփուզը ձեռին փչեց դոշունի աղաքն ու որ աջ ու ձախ հասցրուց հա՛, ոնց որ գերանդով խոտը վերտաս: Մի՛ն, երկո՛ւ, իրե՛ք, մի խոսքով՝ մի սհաթումը էնղդա հալ դոշունը սըլամաթ կտորեց ու եղ տուն մտավ:

Վրա երկու օրը էն ա հա Ղասաբ-օղլուն չքել գոտկատեղը սըղացրել ին, որ դոշունը էլեղ դուռը պատեց: Էս դոնուշվա դոշունն էլ քսան հըզար մարդ էր: Արաբուզանգին ասլանի պէս դուս էկավ թոփուզը ձեռին, ընգավ դոշունի մեջն ու մի շնչումը բիրադի ջարդեց: Ըծու եղ տուն մտավ, իր լացի բանին կացավ: Թըզավորը էս բանի վրա ջըլիզդան ըրմացավ: Նա ի՛նչ խիալ կաներ, որ մի կնիկարմատ էղղդամ հալ դոշունին կջարդեր: Վրա իրեք օրն էլ երկու էնղդամ դոշուն հըվաքեց, որ մթա թե Արաբուզանգուն ջըլիզ փարչափարա անեն: Նա հենց գիղեր, թե Ղասաբ-օղլին էնա՛ ինչ քար դառավ պրծավ, էնա Արաբուզանգուն ու իր տղին էլ սպանիլ կտա ու ըրմաղան Դունյա-գյոզալին իր կնիկը կշինի:

Մախլասի, գլուխներըդ ի՛նչ ցըվացնեմ, ոնց որ ասի, վրա իրեք օրը թըզավորի քառսուն հըզար դոշունը թագադան պատեց դուռը: Հըմա Ղասաբ-օղլուն քիչ ա մնացել որ սղացնեն, ըրտասունքը հասել ա մչվանց ճակատը: Իլլաջ չկար, Արաբուզանգին կիսատ թողուց ու թոփուզը ձեռին դուս էլավ:

Դուս էլավ ի՛նչ տեհավ, որ սաղ աշխարքը դոշունը պատել ա. թոփուզը պտըտեց ու մեջ խաղաց. մի՛ն դես, մի՛ն դեն՝ մի սրումը մի քանի հըզարին շուռ տվուց: Հըմա էս դոնուշ դոշունը շատ էր կըտաղած կռիվ անում:

Արաբուզանգին էլ դե իրեք օր բերանը մընանա չառած՝ քշեր-ցերեկ համ ըրտասունք չափեր, համ էլ դոշունի կռիվ տեր: Ընենց որ խեղճը կամաց-կամաց հրաքաթից ընգավ ու մին էլ ջիլիզդան թիլացավ ու վեր ընգավ: Կըտադած դոշունին էլ էդ էր պետքը. դարսու-չորսու վրա թափեցին ու էն ա հա՛ ծվիկ-ծվիկ ին անըմ, որ մի բիրդան Ղասաբ-օղլին բուլըլմիշ էլավ: Արաբուզանգին չքել դռանը կռիվ էր տալի, Դունյա-գյոզալն ու թըզավորի տղեն էնդդամ լաց էլան, որ ըրտասունքը գլխիցը հետ կաղնեց: Ղասաբ-օղլին փոշտաց, սըղացավ:

— Պա՛, էս ինչ շատ քնել եմ:

Վախտը անցկեներ, խըտատացրին թե.— Հա՛յ աման, չուստ արա, վրա հասի, որ Արաբուզանգուն սպանեցին:

Ղասաբ-օղլին շշկլվածի պես դուս թռավ ու հլե ընդի վրա հասավ, որ ողջ դոշունը կիտված էն ա հա՛ Արաբուզանգուն թիքա-թիքա էն անըմ: Աղաք վազեց, մի ձեռը դրուց Արաբուզանգու ըրեսին, հարայ-հրոց գձեց, մի ձեռով էլ թոփուզը վիկալավ ու մի երկու ո՛ր դես ու դեն պըտըտեց հա՛, դոշունի աչքը վախեց, խելի էդ քաշվեց: Իժու տեղիցը կաղնեց, թոփուզը շիդակեց դբա էս դոշունն ու՝ ո՛ր չըրփպացներ ոչ՝ ամեն մի վրա բերելով հինգ հարիր մարդ շիլ ու քութ ըլեր: Մի սհաթումը քսան հըզարին էլ սա ջարդ տվուց ու մնացողնին էլ դրա գոռը որ տեհան, ահ ու դողով փախս առան. ու մժա չիմ ցաք ու ցրիվ էլան: Թըզավորի մատը մնաց բերնըմը: Ըժու բոնեցին էս քու թըզավորին, մի խամ դուլանի պոչից կապեցին ու բաց թողին: Մադյանը սաղ օրը էնդդամ քաշ տվուց, որ բիզունը թըզավորի չոր կարկաժը թխթխկալեն պոչիցը կապած եղ բերուց:

Օխտն օր, օխտը քշեր թըզավորի տղի հըրսանիքն էր: Նա Դունյա-գյոզալին հետ պսակվեց, Ղասաբօղլին՝ Արաբուզանգու: Ինքն իր հոր թախտի վրա թըզավոր նստեց, Ղասաբ-օղլուն էլ նազիրվեզիր կարքեց:

Բարին ըստի, չարին՝ անօրենի ըշխարումը: Ասծանե իրեք խնձոր վեր ընգավ. մինն՝ ասողին, մինը՝ լսողին, մինն էլ ալամ ըշխարքին: